

## 2 JUAN

### 2 Juandih jwí tui beh joyát pínah naáwát

**¿Déhe tiguaá daacniji?** Jon játih Jesúhwa maáta “Juan, Jesús chah á oini, á bohéni, á naáwát tútuniji nin núodih át daacáp tají”, íť níj naáwáp wut jī. Caanjéh muntih San Juan, 1 Juan, 3 Juan, Apocalipsisdihbut daacni át jumap wut jī.

**¿Dedih át daacji?** Biíc poómp Jesúhwádih Juan nin núodih át daac wahap tají. (1.1) Obohjeéhtih, dedboó í jumatdih jwí jéihcan caá.

**¿Dedmant, débólih cah, át daacji?** Chah jéihnit “Juan á jwíh daacni núodih á daacát táttimahbit, jópchi 85—95 (Jesús á wənat táttimah 52—62 jópchi táttimah) nin núodihbut át daac wahap wut jī”, í níj jengah joiná caá.

**¿Dedé pínah tiguaá át daacji?** Caán láa Jesúh doonádih dawá naóh jibnit í bohé jibichah, Jesúhwa íh mənánádih ípí úwat tútup wut jī. Obohjeéhtih, yee naóhnitbut biíc yoobó íť naóh jibip wut jī. Pánihna, queét yeenitdih Jesúhwa í teo wáacat át tobohóp wut jī. Pánihna, queét Jesúhwa yee bohénitdih Juan át tui beh enat tútup tají, yeejépwádih í teo wáacat pínah niijná.

Ded pah 2 Juan á jumap:

1. Queétdih á táyat tútat (vs. 1-3)
2. Í míic oyatdih á wətat (vs. 4-6)
3. Ded pah yee naóhnit, í bohéatbut á jumap (vs. 7-11)
4. Á péé táyat tútat (vs. 12-13)

#### Queétdih á táyat tútat

<sup>1</sup>Weém Juan, Jesúhwádih waóhni, meém Dios á ñionihdih ma weh panihnitdihbut wá daac wahna caá. Yoobópdih yeebdíh wá oina caá. Weém biícjeh pohba nihcan, nihát túini doonádih jéihnitbut yeebdíh í oina caá. <sup>2</sup>Jwiít nihát caán túini doonádih jepahnit jumna, caandíh jwí tui jengah joí cádahcan níť. Pánih jumna, yeebdíh búdí jwí oina caá. <sup>3</sup>Dios jwí íp, Jesucristo á wúhbut búdí oinit, yeebdíh í jígah en teo wáaca naáh, ñi tui jumap pínah niijná.

#### Míic oyat tútat

<sup>4</sup>Jwí íp jwiít nihát dīh á wətat pah, Jesús á bohéatdih biquína ma weh panihnit í tui jepahat doonádih joinít, búdí wá wəina caá. <sup>5</sup>Némá, buú meemdíh wá naáwát jáap wətat nihcan caá. Jesús dīh jwíh jepahnit jwí

jumuchah, nin pah jwiít dīh á níj wətup jī. “Ñi míic oyoó”, á niijp jī. Pánihna, jwíjeéh jumnitdih jwí oyat dée caá. <sup>6</sup>Dios dīh yoobópdih oinit, á wətat pah jwí tui chájbipna caá. Pánihna, jwíh jepahnit ñi joyátji pah buubut nin pah yeebdíh wá wətna caá: Bitadīh oinit, ñi tui teo wáaca. <sup>\*</sup>

#### Dawá yeenit í jumap

<sup>7</sup>Pánt niijná, nin pahbut yeebdíh wá naóhna caá: “Jesucristo nin baácboó á cáac jumap dooná yoobópdih nihcan caá”, niijnít, dawá í yee bohéna caá. Det páant yee bohénit Yeeni Yoobát, Cristodih En Jéihni pah í jumna caá. <sup>8</sup>Queétdih ñi tui chája chaáh! Cristodih ñi teo wəhat jíib ñi buúdcát pínah niijná, í yee bohéatdih ñi jepahca bojoó. Yeéb yoobópdih Jesús dīh ñi péé cádahcatdih ennit, Dios yeebdíh chah túini á chájbipna caá.

<sup>9</sup>Det Cristoih bohéatdih cádahnit, “Wá jengah joyát caá chah á táyup”, níj jengah

\* 4 3Jn 3 \* 5 Jn 13.34; 15.12,17 \* 6 Jn 14.15,23-24; 1Jn 5.3 \* 7 Mt 7.15; 1 Jn 2.18; 4.1-3

joinít, jwí ípíhwā nihcan caá.  
 Obohjeéhtih, det caandíh cádahcannit,  
 Dios jwí ípíjh, ā wūúhjihbut táí bícdih í  
 jumna caá.\* <sup>10</sup>Pánihna, “Cristoíh  
 naáwátidihjeh caá wā bohénap”, niijná  
 yuhna, mácah bohéátidih naóhni ñi  
 pebhna ā jwíbínachah, caandíh wēi  
 jwāáhcanjeh, ñíh mæúdíh ñi waadát  
 tútca bojoó. <sup>11</sup>Páant mácah bohéátidih  
 naóhna, Cristoíh bohéátidih náahcan,  
 yeejép chājni caá. Pánihna, caandíh wēi  
 jwāáhniboó yeejép chājnidih teo wáacna  
 caá ā chājap. Páant ñi chājca bojoó.

### Ā pée naáwát

<sup>12</sup>Yeebdíh chah naáwíhna yuhna,  
 caandíh wā daáquíhcan caá. Obohjeéhtih,  
 yeéb bícdih míc wéheat tút niijná,  
 yeebdíh enedih wā bejíhna caá. Pánih  
 míc wéhenit, jwiít nihat bícdih jwí táí  
 wēibipna caá.\*

<sup>13</sup>Ninjíh bóli, ma jwan panihnih, Dios ā  
 ñíonih, mi weh meemdíh í táyat tútca  
 caá.

Páant bóojeh tigaá wā naáwát.  
 Juan